

समे – 12:25

<><><><><><>

Air Force Day

राष्ट्रपति द्रौपदी मुर्मू, उपराष्ट्रपति जगदीप धनखड़ ते प्रधानमंत्री नरेन्द्र मोदी होरें अज्ज वायु सेना दिवस दे मौके पर सब्बने हवाई योद्धाएं ते उंदे परोआरें गी शुभकामनां दित्तियां न। इक सोशल मीडिया पोस्ट च राष्ट्रपति होरें आक्खेआ जे भारतीय हवाई सेना नमिएं उंचाइं गी छूआ करदी ऐ ते राष्ट्र गी नेयी मजबूत दिलेर ते जोशीली सेना पर मान ऐ जेहड़ी म्हेशां चुनौतिएं दा सामना करने लेई तैआर रौंहदी ऐ। उनें गलाया साढे हीरो ना शडा गासै दी राक्खी करदे न सगुआं मनुक्खी मदाद लेई बी म्हेशां तैआर बर तैआर रौंहदे न। उपराष्ट्रपति होरें गलाया जे दलेर हवाई सैनिक साढे देसै दे मान दी राक्खी हिफाजत करदे होई खुले गासै च डोआरी भरदे न। प्रधानमंत्री होरें आक्खेआ जे देसै गी भारतीय हवाई सेना दी दिलेरी ते समर्पण पर मान ऐ। भारतीय वायु सेना अज्ज उत्तर प्रदेश दे हवाई सेना स्टेशन बमरौली च वासु सेना दिवस परेड च अपने नमें झंडे दा बी अनावरण करा करदी ऐ। एह ध्याडा भारतीय वायु सेना दे गठन दे चेते च मनाया जंदा ऐ। इसी अधिकारिक तौरा पर 8 अक्टूबर 1932 च स्थापत कीता गेआ हा। इस ध्याडे गी मनांदे होई समूलचे देसै च शानदार परेड ते समारोहें दा सरिस्ता कीता जंदा ऐ।

<><><><><><>

Asian Games

प्रधानमंत्री नरेन्द्र मोदी होरें एशियाई खेड्डें च अजें तगर दे सब्बने शा मते 107 तगमें जित्तने आले भारतीय दल गी बधाई दिंदे होई आक्खेआ जे पिछले 60एं बरें च एककडे बेहतरीन प्रदर्शन कन्नै समूलचा देस बडा खुश ऐ। सोशल मीडिया पर पोस्ट कीते गेदे इक सनेए च श्री मोदी होरें आक्खेआ जे साढे खडारिएं दे अनत्रुट पक्के धेइयै, सख्त मेहनत ते उंदे जज्बे नै देसै गी मान दोआया ऐ। उंदी जित्त नै असेंगी चेता रखने ताई नेकां पल दित्ते न ते असें सब्बनें गी प्रेरित कीता ऐ। तोआई क्रिकेट विश्व कप च अज्ज भारतीय टीम चेन्नई दे एम.ए.चिंदरम स्टेडियम च आस्ट्रेलिया खलाफ अपना अभियान रंभ करोग। मैच भारतीय समें मताबक दपैहरी 2 बजे शुरू होग। केन्द्री खेड्ड मंत्री अनुराग सिंह ठाकुर होरें आईसीसी विश्व कप लेई भारतीय क्रिकेट टीम गी शुभकामनां दित्तियां न।

<><><><><><>

LG

उपराज्यपाल मनोज सिन्हा होरें जोर देइयै आक्खेआ ऐ जे प्रधानमंत्री नरेन्द्र मोदी हुंदी अगुवाई ते मार्गदर्शन हेठ जम्मू कश्मीर च बड़ा मता समाजिक ते आर्थिक विकास होआ ऐ। उनें पिछले ब'रे थमां होआ'रदी तबाई, बरबादी आले दौर शा जम्मू कश्मीर गी बाहर कडिड्यै इत्थें खुशहाली लेई आंदी ऐ। एह गल्ल जंदे रोज श्रीनगर च Young Presidents Organisation Greater India Chapter दे मिंबरें कन्नै मलाटी करदे होई आक्खी। युवा उद्यमी नेताएं दी सराहना करदे होई उपराज्यपाल होरें आक्खेआ जे मजूदा सरकार नै ऐसा माहौल बनाया ऐ जित्थें लोक अपने स्थाबै अपना जीवन जी सकदे न। कारोबार लेई साजगार माहौल उपलब्ध करोआया गेआ ऐ ते उद्यमिणं गी लोडचदे ते बनकदे मौके दित्ते जा'रदे न तां जे ओह अपने विचारें गी सफल कारोबार च तब्दील करी सकन। श्री सिन्हा होरें आक्खेआ जे जम्मू कश्मीर हुन पिछले किश ब'रे दरान देसै दी सब्बने शा तेजिया कन्नै बधा करदी अर्थ-बवस्था ऐ।

<><><><><><>

CRPF Advisor

उपराज्यपाल हुंदे सलाहकार राजीव राय भटनागर होरें देसै च लोकें बश्कार राश्ट्री एकता ते आपसी भाईचारे गी बधाने दे मकसद कन्नै अज्ज सीआरपीएफ बनतलाब कैप थमां सीआरपीएफ महिला मोटर सैकल रैली 2023 गी सैली झंडी दस्सियै रवाना कीता। एह रैली पैहले अमृतसर ते फही देसै दे होर दुए हिस्सें च जाग। इस मौके बोलदे होई सलाहकार होरें आक्खेआ जे एह मोटर सैकल चलाने आलियां महिला देसै च राश्ट्र विरोधी ताकतें कन्नै लड़ने च सीआरपीएफ दी भूमका दस्सगंन ते महिला सशक्तिकरण दा सनेया देने दे इलावा पर्यावरण सरबंधी मुद्दे पर लोकें गी जागरूक बी करगंन।

<><><><><><>

Heavy Industries

लोकें तोड़ी पुज्ज बनाने आले इक कार्यक्रम तैहत भारी उद्योग मैहकमे दे केन्द्री मंत्री महेन्द्र नाथ पांडे होरें कल दक्खन कश्मीर दे पुलवामा दा दौरा लाइयै बक्ख-बक्ख परियोजनाएं दे कम्में दी समीक्षा कीती। उनें कम्में पर संदोख प्रगट करदे होइ आक्खेआ जे केन्द्र इस गल्ला गी जकीनी बनाना चांहदा ऐ जे केन्द्र शासत प्रदेश जम्मू कश्मीर दे बसनीकें गी बेहतरीन सेवां ते लाह थ्होए। श्री पांडे होरें पंचैती राज संस्थानें दी नुमांयदगी करने आले बक्ख-बक्ख प्रतिनिधिमंडलें कन्नै बी मलाटी लाई।



Sankalp Saptah

संकल्प सप्ताह दे हिस्से दे तौर पर मनकोट ब्लाक च कृषि महोत्सव विशे सार बारे कार्यक्रम आयोजित कीता गेआ। इस दरान करसानें गी जैविक खेती, प्रधानमंत्री किसान, करसान दोआर कार्ड ते करसान उत्पादक संगठनें गी होर मजबूत बनाने दे तौर तरीके बारे जानकार कीता गेआ। पुंछ दे डिप्टी कमीशनर यासीन एम. चौधरी होरें कार्यक्रम दी सदारत कीती। एहदे च करीबन 300 करसानें हिस्सा लैता। मेले दरान बक्ख-बक्ख सरकारी स्कीमें, राई-बाई दे भलेआ अज्जै कल्लै दिएं तकनीकें, गोबर-धन ते राई-बाई सेक्टर कन्नै जुड़ी दिएं होर दूइएं चीजे ते कम्में कारवाइएं बारे जानकारी देने आले स्टाल लाए गे। डिप्टी कमीशनर होरें मुतलका अफसरें गी हिदायत कीती जे ओह ग्रामीण इलाकें च जागरूकता अभियान चलान ते राई-बाई ते करसानें सरबंधी गतिविधिएं लेई साईसी तौर तरीके ते तकनीकें गी बढ़ावा देने लेई लोकें गी जानकार बनान।



Half Marathon

अमन रमानदारी दा सनेआ देने ते नौजवानें दी ऊर्जा दा बेहतर तरीके कन्नै इस्तेमाल करने दे मकसद कन्नै भद्रवाह च सेना दी राश्ट्री राइफल्स यूनिट नै अज्ज रन फॉर पीस अददी मैराथन द्रौड़ दा सरिस्ता कीता। एहदे च 20एं कालेजे दियां 110 छात्राएं सनें तकरीबन 300 विद्यार्थी जोश-जब्बे कन्नै एहदे च शामिल होए।



Doda

डोडा दे जिला विकास कमीशनर विशेष पाल महाजन होर सरबंधत बक्ख-बक्ख मैहकमे दी बैठक सदियै प्रधानमंत्री रोजगार सृजन कार्यक्रम, मुद्रा योजना, मुमकिन स्कीम ते स्टार्ट अप लेई तेजस्विनी योजना तैह्त होआ'रदे कम्में ते हासल उपलब्धिएं बारे जानकारी हासल कीती जिंदे तैह्त लाभार्थिं गी माली सहायता ते मार्गदर्शन उपलब्ध कराया जा करदा ऐ। डीसी होरें जिले च बकाया राँहदे सब्बने मामलें जिंदे तैह्त बक्ख-बक्ख बैंकें आस्सेआ लाभार्थिं गी माली सहायता दिक्ती जानी ऐ, गी नबेड़ने लेई इक म्हीने दी समें सीमा तैह कीती ऐ तां जे स्व-रोजगार स्कीमें तैह्त 100 प्रतिशत लाभार्थिं गी रकमा थ्होई सकन।

